


Месяца иуния
в 25-й день.



ПРОЕКТ СЛУЖБЫ
ИЖЕ ВО СВЯТЫХ
ОТЦА НАШЕГО НИКИТЫ,
ЕПИСКОПА
РЕМИСИАНСКАГО.







Месяца иуния в 25-й день.*¹

Отдание Рождества святого Иоанна Предтечи;
И память иже во святых отца нашего Никиты,
епископа Ремисианского.

[Службу святых преподобномученицы Февронии поем на
Повечерии.]

На Велицей вечерни.

На Господи, воззвах: стихиры на 8;

Предтечевы самогласны 3:.*²

Разрешает Захариино молчание ...

Днесь глас Слова глас, за неверие ...

[Анатолия:] Божию Слову хотящу от Девы ...

И святителя Никиты 5, глас 3:

Евангельским проповеданием твоим, * непроходныя горы
достигл еси; * и люди многобожием омраченныя, * светом
боговедения просветил еси, * и Христу неизчетная Мисийская
множества уневестил еси; * Церковь [соборную] от язычник
исполнив, * и течение твое благополучно совершив, * единому
Подвигоположнику и Венцедателю благонадеж[д]но предстал еси; *
егоже моли о нас, * отче Никито всеблаженне, * любовь твою творящих
всечестную память твою. [Дважды.]

Многая чада ко Христу [крещением] привел еси, * и пищею
Евангельских проповеданий твоих воспитал еси; * Церковь
[Божью] от Мисийских язык возрадив, * и благочестие во странах
чуждых распространив; * [мздо]воздаяние трудов твоих от Господа

¹* праздник свт. Никите еп. Ремезианского пада 24. јуна, али да се не би преклапао са празником Рођења св. Јована Крститеља пренесимо га на следећи дан.

²* Зри в Минеи 25-го иуния.

приял еси, * и в селения вышняя*³ радуясь вселился еси; * идеже не престай моляся ко Господу о нас, * отче Никито преосвященне, * восхваляющих всепразднственную память твою. [Дважды.]

Евангельское проповедание и апостольское вещание исполнил еси; * архиерейское служение непостыдно соблюл еси, * и о пастве твоей неусыпно [ко] Господу молился еси; * *в соборах святительских счислився,*⁴ * и во обителях небесных водворився; * о сплещенников твоих Христу Богу выну молился, * отче Никито богодухновенне, * воспевающих всеславную память твою.

Слава ... глас 3:

О! каковаго*⁵ дивнаго пременения! * о како благополучнаго обращения! * непроходныя горы и кровавыя * доселе сокрывающыя разбойники дивия, * ныне же обращенныя в питомцы мира; * в пещере идеже пребываше злодей, * ныне праведник сокрывается; * идеже бяху обычаи злонравныя, * ныне [суть] монашеская селения и божественная песнопения; * идеже бе предел идоложертвования, * тамо ныне область Богопоклонения; * идеже бяху бесовская требища, * ныне храми единому истинному Богу * и его угодником воздвизаются. **И** ныне ... Праздника, глас 8:

Видь Елисаветь, к Деве Марии глаголющу: * Что пришла еси ко мне, Мати Господа моего? * Ты Царя носиши, и аз воина; * Ты Законодавца, и аз законоположителя; * Ты Слова, и аз глас, * проповедающь Царство Небесное.

Вход. Свете тихий ... Прокимен дне. Чтения три святительская.

На литии, стихиры: едина храма;

И едина Предтечи, глас 1, самогласна:

Искапайте, горы, сладость, и холми ...

И сия святителя Никиты, глас 4:

Западным*⁶ [странам] с Христовым благовестием пришедшаго, * и люди во тьме [неведения] сидящия учением Божественным

³* или: горняя.

⁴* или: престолех ... седяй.

⁵* или: како.

⁶* у србско-словенским богослужбеним текстовима зѡпаднаѡ (мнoж.) - западне [земље, стране, крајеви] се назива све што је западно од Јерусалима тј. истока, а посебно: Рашка, тј. Србија. У савременим српским преводима се уобичајило нетачно преводјење са: запад.

просветившаго, * и вся Мисийския язы[чни]ки Христу Богу
приведшаго, * множества истуканом порабощенная от смерти
вечныя избавльшаго, * славим яко равноапостольнаго, Никиту
святаго, * от лести идольския я свободдшаго. [Глас 8:]

Како достойно ублажим Никиту богоглаголиваго, *
пречестный сосуд Божия благодати? * яко проповеданием
евангельским апостолом уподобися, * [первее бо] пришед во страну
Мисийскую, * идолопоклонением омрачения светом богоразумия
Христова облиста; * о! богоблаженне, Никито преосвященне, * в
подвизех преславных просиявший, * присно нас заступай пред
Господем славы.

Слава ... глас тойже:

О! чудесе дивнаго, * како благочестие яко столп прекрасный
вместо идолопоклонения * апостольскими *[труды и]
подвиги^{7*} святителя Никиты * в Мисийстей стране воздвизается. *
Днесь Христа Бога славословят людие Мисийстии, * силы же
демонския вспять обращаются. * О! Христе Боже, * толикия милости
нам [щедро] даровавый, * архиереем твоим Никитою, * спаси души
наша яко [много]благоутробен. **И** ныне ... Богородичен, глас тойже:

Безвестная Дево, яже Бога неизреченно заченши ...

На стиховне: стихиры Октоиха, или:

Предтечевы, самогласны, глас 2:^{8*}

Иже от пророка пророка, и неплодныя ...

Стих: Благословен Господь Бог Израилев, * яко посети и сотвори
избавление людем Своим.^{9*}

Прииде глас благодати Слова, Солнца проповедник ...

Стих: И Ты, отроча, * пророк Вышняго наречешия.^{10*}

Иже из чрева матерня освящся ...

Слава ... святителя Никиты, глас 6:

^{7*} или: [трудами и] подвигами.

^{8*} Зри в Минеи 24-го иуния.

^{9*} Лк. 1,68.

^{10*} Лк. 1,76.

Святителю отче Никито, * во всю землю Мисийскую изыде
вещание исправлений^{*11} твоих; * темже на небесех обрел еси
мзду трудов твоих, * демонская разорил еси капища, * и ангельския
достигл еси чины, * ихже житию вседушно поревновал еси. * Темже
дерзновение имея ко Христу Богу, * мир миру испроси, * и душам
нашим велию милость.

И ныне ... **Праздника, глас тойже:**

Елисавет зачат Предтечу благодати, * Дева же Господа славы, *
целовастеся обе матери, * и младенец взыграл: * внутрь бо
раб хваляше Владыку. * Удивившись же, мати Предтечева начат
вопити: * Откуда мне се, * да Мати Господа моего прииде ко мне? *
Да спасет люди отчаянные * Имеяй велию милость.

На благословении хлебов: тропарь святителя Никиты, глас 8:

Православия наставниче, * благочестия учителю и чистоты, *
вселенная светильниче, * архиереев богодухновенное
удобрение, * Никито премудре, * ученьми твоими *вся [Мисийския
языки]^{*12} просветил еси, * цевнице духовная, * моли Христа Бога,
спаситися душам нашим. **[Дважды.] И:**

Богородице Дево, радуйся благодатная Марие ... [Единожды.]

На Утрени.

На Бог Господ: тропарь Предтечи, глас 4:

Пророче и предтече пришествия Христова ... [Дважды.]

Слава ... тропарь святителя Никиты, глас 8:

Православия наставниче, * благочестия учителю ...

И ныне ... **Богородичен, глас тойже:**

Иже нас ради рождется от Девы ...

По 1-м стихословии: седальни Предтечевы, глас 4.*13

Подобен: Удивися Иосиф ...

Ныне прозябе нам Захариин плод, и веселит разумно ...

^{11*} или: проповеданий.

^{12*} или: всю Мисийскую страну.

^{13*} Зри в Минееи 24-го иуния.

Слава ... глас 8.

Подобен: Премудрости ...

Христова пришествия начаток, преславно родился еси ...

И ныне ... Богородичен, глас тойже:

Пресвятая Дево, Мати Христова, души моя страсти ...

По 2-м стихословии: седален святителя Никиты, глас 4.

Подобен: Вознесыйся ...

Божественными сияньми, святителю отче Никито, * душу твою [богодухновенно] озарил еси, * и евангельскими проповеданьми твоими всю землю Мисийскую просветил еси; * имея в сердце твоём Христа, * просвещаеши же яко солнце незаходимое языческая множества, * добродетельми восходя [на] лестницу небесную. [Дважды.] Слава ... и ныне ... Богородичен, глас тойже:

Грехолюбивый аз и вседерзый, * молю тя, Дево всенепорочная, * рождшую вземлющего грех мира, * [к] Тому молися: * да ущедрит душу мою многогрешную, * и очистит вся грехи моя; * Ты бо еси грешных крепкое предстательство, * и помощь, и прибежище.

[На полиелеи: Величание:

Величаем тя, * святителю отче Никито, равноапостольне, * вся Мисийския языки * ученьми твоими просвещшаго, * и ко Христу приведшаго.

Псалом избранный святительский:

Услышите сия вси языцы ...*¹⁴

Таже: Степенна, а-й антифон 4-го гласа.

Прокимен, глас 4:

Уста моя возглаголют премудрость, * и поучение сердца моего разум.*¹⁵

Стих: Уста праведнаго поучатся премудрости, * и язык его возглаголет суд.*¹⁶

¹⁴* Пс. 48,2.

¹⁵* Пс. 48,4.

Святое Евангелие от Иоанна, зач. 35]

По 50-м псалме стихира, глас 6:

Днесь радостно ликует [преславный] град Ремисианский, * и таинственно веселится светом Евангелиа Христова облистанная*¹⁷ * вся Мисийская с окрестными странами,*¹⁸ * западнии с восточными составляют лик празднственный, * песненно торжествующе о памяти святителя Никиты, * и к нему согласно вопиюще: * Отче святе, от всяких нас бед [и обстоятельств] избавляй, * и пред престолом Всевышняго заступай, * благоприятными твоими молитвами.

Канон Предтечи [творение Иоанна монаха],
и канон святителю Никите, глас 8 –
егоже краегранесие (в тропарех):

Никиту воспеваю премудраго.

В богородичнах же и в седальне: Брат Зораст.

Песнь 1. Ирмос:

[Воду прошед яко сушу, * и египетскаго зла избежав, * Израильтянин вопияше: * Избавителю и Богу нашему поим.]

Никиту воспевати премудраго, * добре потрудившагося в благовестии Христове, * и омраченныя страны Мисийския светом богоразумия просвещшаго, * Христе мой, слово ми даруй [невеж(д)ы].*¹⁹

Извятийствовати достойная похваления, * славы небесныя сподобльшемуся * и венцем победы увязшемуся, Никите богоглаголивому, * Слове Божий, сподоби мя [недостойнаго].

Крестившаго [неизчетная] Мисийская множества, * и дивия нравы Христовым благовестием ублаготворившаго, * Никиту апостолом единоправнаго, * Господи благий, похвалити [по достоянию] ум ми озари.

Богородичен:

^{16*} Пс. 36,30.

^{17*} или: просвещенная.

^{18*} или: землями.

^{19*} или: невеж(д)е ?

Богородице, лозо истинная, * возрадившая нам Плод безсмертия; * тебе молимся, Владичице, * молися к Сыну твоему и Господу нашему, * от исления избавити живот наш.

Песнь 3. Ирмос:

[Небеснаго круга верхотворче Господи, * и Церкви зиждителю, * ты мене утверди в любви Твоей, * желаний краю, * верных утверждение, * едине Человеколюбче.]

Иноческа[я] множества в непроходных горах Мисийских насадил еси, * и [прежде] разбойническая вертепы * [ныне] (в) селения праведнича * трудолюбно преложил еси.

Тайноводственный отец множеству духовному был еси, * и яко путесотворитель*²⁰ неложный*²¹ * к Царствию небесному люди паствы твоея направил еси.

Умная очеса к боговедению * не благочестивым людям отверзал еси, * и душевная чувства и совести их * благовестием очистил еси.

Богородичен:

Радуйся, едина * Бога плотию [во спасение всех] рождающая; * и едина в женах * по рождестве нетленна пребывающая; * Богородице, Дево пречистая.

Кондак Предтечи, глас 3.

Подобен: Дева днесь ...

Прежде неплоды днесь Христова Предтечу ...

Икос: Иисуса Христа, истиннаго Бога нашего ...

Седален, глас 3:

Апостольское вещание и архиерейское служение * добропобедно Никито всеславне совершил еси, * и праведное [мздо]воздаяние от великаго архипастыря приял еси; * [и] ныне со святительскими лики радуешься, * присно предстоя у престола Царя славы.

[Дважды.]

Слава ... и ныне ... Богородичен, глас тойже:

^{20*} или: путевождь / путеводитель.

^{21*} или: неблаженный.

Твоему покрову ныне прибегаем, Богородице Владичице, * и божественному предстательству твоему; * избави нас от лютых прегрешений молимся, * едина Благословенная и Всечистая, * Бога плотию во спасение всех рождшая.

Песнь 4. Ирмос:

[Услышах Господи, смотрения твоего таинство, * разумех дела твоя, * и прославих твое Божество.]

Веру истинную яко [пре]мудрый вертоградарь,²² * в пределах Мисийских насадил еси, * и прилежно возделав * [во время благопотребно] * во сто трудов у плодоносил еси.

Окрестныя вся страны Дунайския * ныне восхваляют дивнаго святителя, * Никиту, божественнаго глагольника, * апостолом сопричастника и отцем собеседника, * и [пред Богом] таинственнаго²³ своего заступника.

Страннолюбно все житие твое пожив, * и обнищавшыя [духом] Христом обогатив, * [к] тому яко Единому животу²⁴ * всерадостно представился еси.

Богородичен:

Зачала еси безсеменно, * и родила еси неизреченно, * егоже чиноначалия ангельская немолчно воспевают; * и нас сподоби непрестанно Того славить, * Тебе же величати.

Песнь 5. Ирмос:

[Просвети нас повелении твоими, Господи, * и мышцею твоею высокою * твой мир подаждь нам, * Человеколюбче.]

Победы тезоимените, Никито добропобедне,²⁵ *ловец людей преизряден явился еси, * и Мисийское множество [ко] Христу * мрежею словес богоглаголивых уловил еси.

Еже от века утаеное * апостольски языческим странам возвещая, * архиерейское служение достойно исполнил еси, * и течение животное благополучно совершил еси.

²²* или: земледелец.

²³* или: теплаго.

²⁴* или: богатому.

²⁵* или: преславне.

Всеоружием благочестия благоподобно одеаяся, * врага рода человеческого на тризнице крепко поразил еси, * и чада многая [ко] единому Человеколюбцу привел еси. **Богородичен:**

Одесную Царя небеснаго предстоящи, * и недреманно о роде христианством Того молящи, * пресвятая Владичице, и о нас не престай * на тя упование полагающих.

Песнь 6. Ирмос:

[Молитву пролию ко Господу, * и тому возведу печали моя, * яко зол душа моя исполнися, * и живот мой аду приближися, * и молюся яко Иона: * От тли, Боже, возведи мя.]

Авраамле страннолюбие преобильно явил еси благочестием учреждая, * многобожием [духовно] алчущия и жаждущия * люди страны Мисийския.

Юдоль [сию] плачевную бодро проходил еси, * утешая вся скорбящия, * и исцеляя вся немощствующия, * бесы [от людей твоих] отгоняя злотворных.

Правоверие в страну Мисийскую * [бого]мудро насадил еси, * и благое устройство * в дивия пределы [подунайския] * смотрительно ввел еси. **Богородичен:**

Рождшую Бога Слова без исления, * и Девою пребывшую без пременения; * песнями достохвальными ублажаем тя, * Мати Дево.

Кондак, глас 2:

Богоглаголиваго [вси] Никиту * в душах людей своих * премудрость христианскаго учения положшаго, * в хвалебных песнях вернии ныне ублажим, * яко благовестителем [и просветителем] равностоятельна[го]; престолу бо славы Божия ныне предстоит, * и со равноапостольными веселится, * моляся непрестанно о душах наших. **Икос:**

Избраному светильнику и победы тезоименитому, Божию Архiereю Никите преславному; Мисийских стран просветителю, и града Ремисианскаго первосвятителю; Евангелиа Христова [крепкому]*²⁶ проповедателю, и таин Божественных

^{26*} или: богоглаголивому.

[верному] строителю, сия похвальная пения приносим: **Р**адуйся, земли Мисийския [благоепное]*²⁷ украшение; радуйся, словенское [благоцветущее]*²⁸ прозябение. Радуйся, нового рождия*²⁹ [бого]мудрый насадителю; радуйся, винограда Христова бодрый делателю. Радуйся, евангельского света обильный подателю; радуйся, благочестия боговещанный распространителю. Радуйся, евангельских проповеданий неоскудный источнике; радуйся, равноапостольных единомравный сопричастниче. Радуйся, омраченных многобожием просветителю; радуйся, многих чад духовный родителю. Радуйся, святителем изрядная похвало; радуйся, правоверных неоторимое забрало. **[Людие:]**

Радуйся, отче Никито, предивный святителю и неистовств языческих победителю.

Песнь 7. Ирмос:

[От Иудеи дошедше отроцы в Вавилоне иногда, * верую Троическою пламень пещный попраша, поюще: * Отцев Боже, благословен еси.]

Ремисианского священноначальника восхваляем, * Никиту преизряднаго, * и Христа Бога благодарим * сие светило пресветлое нам даровавшего, * песненно глаголюще: * Отцев Боже, * благословен и препрославлен еси.

Евангельския истины светом тьму неведения * и мерзость идолобесия*³⁰ отгнав еси, * и люди новыя в Церковь от язычник Мисийских привел еси, * богоугодно воспевая: * Отцев Боже, * благословен и превознесен еси.

Мирскаго пристрастия удалився, * и ко премирным [вещем] устремився, * земное течение добре совершил еси, * и ко Господу взывал еси: * Отцев Боже, * благословен и пресвят еси.

Богородичен:

Архангельское целование прияла еси, * и Божественное Аселение была еси, Дево Владичице: * и едина в женах по рождеству * нетленна пребыла еси.

^{27*} или: дивное.

^{28*} или: красное.

^{29*} или: гроздия.

^{30*} или: многобожия.

Песнь 8. Ирмос:

[Царя небесного, * егоже поют вои ангельстии, * хвалите и превозносите во вся веки.]

Украсил еси евангельскими добродетельми неблагородная³¹ множества, * и истинною пищею (пре)питал еси духовно алчущия души * обращающихся [ко] благочестию язычников, вопиющих: * Хвалите и превозносите Христа * избавляющего нас во вся веки.

Духовное утверждение [ты] еси к тебе прибегающих, * и благоуукрашение (раз)умов к тебе вперяющихся * [сердцем своим] и взывающих: * Хвалите и превозносите Христа * спасающего нас во вся веки.

Радостию небоземною ныне празднуем летнее торжество * [преблагословенного и преблаженного] отца нашего Никиты, * и благодаряще [Бога] * даровавшего нам такового угодника, зовем: * Хвалите и превозносите Христа * царствующаго во вся веки. **Богородичен:**

Стену неборимую ты имамы, Владичице, * и предстательство теплое в бедах и обстояниях, * и на тя все упование свое по Бозе возлагаем, воспевающе: * Преблагословенна еси в женах, Всенепорочная.

Песнь 9. Ирмос:

[Воистинну Богородицу, ты исповедуем, * спасении тобою, Дево чистая, * с безплотными лики ты величающе.]

Агнца незлобиваго и кроткаго * непокоривым жестокосердым язычником бодр(енн)о проповедуя, * сердца их ко благосердию и евангельским добродетелем * богомудр(енн)о обращал еси.

Горняго Иерусалима [зело] желая достигнути, * во благовестии апостольстей много потрудился еси, * и венца славы и вечная жизни * от Господа [всех благих подателя] удостоился еси.

³¹* или: худородная.

Облак чад многих окрест себе имея, * яко мать веселяща[я]ся исчадием своим, * и [яко] отец исполнивый сыновом³² дом свой, * [так]о желаемому Христу [непостыдно] предстал еси. **Богородичен:**

Тебе вси стяжахом, Богородице пречистая, * стену неодолимую и известное прибежище, * и тобою присно радуемся, * и ныне нас от всяких бед и зол избави.

Светилен.

Подобен: Жены, услышите ...

Предтечево днесь радостотворное рождение * сетование прешит отча безгласия и рождшия неплодство, * возвещает же настоящую радость и веселие, * темже и вся тварь светло того празднует. **Слава ...**

Свет истинного боговедения * возсиял еси словенским язычником * разсеяним по странам Мисийским, * и благочестия спасительная учения тамо насадил еси, * и от язычник Церковь Христа Бога исполнил еси; * сего ради воспеваем тя, * отче Никито богоблаженне [и преосвященне], * и молим тя: Тому молися * низпослати [и] нам Божественного просвещения.

И ныне ... Богородичен:

Светлостию божественною украшенная, * и премудростию одеянная, * Дево Мати пречистая, * к Сыну твоему и Богу нашему * выну о нас молися, * причастник[ам]и еяже³³ [истее] быти.

На хвалитех стихиры, на 4: Предтечевы 2, глас 8.

Подобен: О! преславного чудесе ...

О! преславного чудесе, * из престарелыя матере, * ...

О! преславного чудесе, * в рожденных женами, * ...

И святителя Никиты 2, глас тойже:

Отче Никито, всеумдре, * от язычник Церковь Христову исполнил еси, * божественными твоими глаголаньми, преславне, * и действием Духа вся языческая сердца ко благочестию

³²* или: сынома.

³³*или: тояже.

обращая, * апостолом [всехвальным] проповеданием Евангелиа [Христово] подобяся; * языком своим неизглаголанная возвещающая, * вся [ко] Христу привлекла еси.

Приидите вси благовернии, * во странах Мисийских пребывающии, * благочестными песньми днесь воспоим * священное [и честное] торжество святителя Никиты; * се бо воистинну деснаго стояния сподобися, * и молитвами своими ко Господу нам ходатайствует. * О! неизреченнаго благосердия твоего Владико, * имже даровал еси нам теплаго предстателя, * и научил еси нас славить тя, * единого Преблагаго. **Слава ... глас тойже:**

Языков множества наставника тя почитаем, * отче Никито, всеблаженне; * твоею бо стезею воистинну право ходити навыкохом; * блажен еси Христу усердно работав, * и вражию крепко обличив силу; * апостолов сопредстольниче и святых отец собеседниче, * и првдных сопричастниче; * с нимиже молися [выну] ко Господу, * помиловатися чтущим [любвию] святую память твою. **И ныне ... Праздника, глас тойже:**

Виждь Елисаветь, к Деве Марии глаголющу: * Что пришла еси ко мне, Мати Господа моего? * Ты Царя носиши, и аз воина; * Ты Законодавца, и аз законоположителя; * Ты Слова, и аз глас, * проповедающе Царство Небесное.

На Литургии.

**Блаженна, на 8: от канона Предтечи, песнь 3-я, на 4;
и от канона святителя Никиты, песнь 6-я, на 4.**

Прокимен дана, глас 1:

Уста моя возглаголют премудрость, * и поучение сердца моего разум.*³⁴

Стих: Услышите сия, вси языцы; * внушите вси живущии по вселенней.*³⁵

Апостол ко Евреям, зачало 318.

Аллилуиа, глас 2:

³⁴* Пс. 48,4.

³⁵* Пс. 48,2.

Стих: Уста праведнаго поучатся премудрости, * и язык его возглаголет суд.^{*36}

Стих: Закон Бога Его в сердце его, * и запнуты стопы его.^{*37}

Святое Евангелие от Матфея, зачало 11.

Причастен:

В память вечную будет праведник, от слуха зла не убоится.^{*38}

* * *

Конец, и Богу слава!

^{36*} Пс. 36,30.

^{37*} Пс. 36,31.

^{38*} Пс. 111,6 и 7.



✱ НОВИЊ СЕРБАДКА „КАЈ ГОДЈА КЪ БЛАГРАДЪ. © НОВИ СРБАДКА 2014. ГОД. У БЕОГРАДУ. ✱